

# DOMENIE IV «VIE PAL AN»

## Jutoris pe Liturgjie

Domenie, ai 28 di Zenâr dal 2018

*Cheste domenie, midiant des leturis, nus fâs poni une riflission sore de peraule, parcè che o metarai lis mês peraulis su la sô bocje; su la bocje di Mosè, di Gjesù, dal profete che Diu al mande.*

*No o sin inflazionâts di peraulis ditis, scritis, trasmatudis, volgarizadis, forestis, nostranis, superfluis, inutilis, ecuivochis, volgârs, cence sens... ma chescj a son suns tantis voltis çondars e vueits; no son la peraule che a un determinât moment il nestri cûr al cûr. Il cûr al domande une peraule umile che e vegni de esperience de vite e di Diu, al cûr une persone che e sepi cjararâ cun Diu e di Diu come par Mosè, come par Gjesù che ancje i demonis i ubidivin. Une peraule finalmentri liberant, che e buti fûr chel satane di mâl che al è dentri di nô.*

*Al è ce che al rivave a fâ Gjesù.*

### Antifone di jentrade

Sal 105,47

**S**alvinus, Signôr nestri Diu,  
e tirinus dongje di framieç dai popui,  
par che al to non sant o podin dâi laude  
e cu la tô laude ricreâsi.

### Colete

Signôr nestri Diu,  
danus di adorâti cun dut il cûr,  
e di volêur ben a ducj i umign cul amôr ch'al covente.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

Dt 18,15-20

**O fasarai vignî fûr un profete e o metarai lis mês peraulis su la sô bocje.**

*Lis primis comunitâts cristianis, in chel Ur fasarai vignî fûr un profete a ân justamentri ricognossût la persone di Gjesù di Nazaret che di lui la int e diseve: Un grant profete al è comparît framieç di nô (Lc 7, 16). Daspò Gjesù stes al à lassât dit: ve che jo us mandî profetis (Mt 23, 33) e Pieri te zornade di Pentecostis al predicjave: i vuestris fis e lis vuestris fiis a profetaran (cfr. Ats 2, 17).*

*Il profete al è come Mosè, metût a puartâ lis peraulis di Diu al popul e la peraule dal popul a Diu. Domandin il lum dal Spirtu Sant par podê ricognossi te nestre glesie locâl la presince di personis che nus inscuelin come un ch'al à autoritât e no come i scrituriscj (vanzeli di vuê).*

### Dal libri dal Deuteronomi

Mosè al fevelà al popul disint: «Il Signôr to Diu al fasarà vignî fûr par te, framieç di te, fra i tiei fradis, un profete compagn di me che i larês daûrji. Al è ce che tu i âs domandât al Signôr to Diu sul Oreb, te di de cunvigne: Par no murî, no scoltarai mai altri la vôs dal Signôr gno Diu e no cjararai plui chest fûc tant grant. Il Signôr mi à rispuindût: A an fevelât ben. Ur fasarai vignî fûr, framieç dai lôr fradis, un profete compagn di te, o metarai lis mês peraulis su la sô bocje e ur disarà dut ce che i ordenarai. Se un nol scolte lis mês peraulis, che chest profete lis varà ditis a non gno, i domandarai cont

jo in persone a di chest om. Se però un profete al à il fiât di dî a non gno une sole peraule che no i ai dât ordin di dîle, e s'al fevele a non di altris dius, chest profete al murarà».

Peraule di Diu.

r

### **SALM RESPONSORIÂL dal Salm 94**

*Al reste simpri il pericol che la vôs dal profete no sedi scoltade. Di fat, il Signôr i dîs al profete Ezechiel (secul VI p.d.C. av.): A son fis cu la muse insolent e cul cûr dâr chei che jo ti mandî di lôr (Ez 2, 4).*

*E vâl ancje pr nô la raccomandazion di Gamaliel al sinedri di Gjerusalem: No stait a riscjâ di metisi in vuere cuintri di Diu! (Ats 5, 39). Par chest o disìn:*

#### **R. Fâs che o scoltìn, Signôr, la tô vôs.**

*Se cjantât: Il cjant dai salms responsoriâi, p. 141.*

Vignît, batìn lis mans al Signôr,  
fasìn fieste a la crete che nus pare;  
presentinsi denant di lui ringraziantlu. **R.**

Vignît, butinsi a schene plete  
denant dal Signôr che nus à creâts,  
parcè che al è lui il nestri Diu,  
e nô, il popul che lui al passone,  
il trop de sô malghe. **R.**

Joi, se vuê la sô vôs o scoltassis:  
«No stait a inrochîsi tal vuestri cûr come a Meribe,  
come tal desert te di di Masse,  
là che mi an tirât a ciment i vuestris paris,  
a an volût provâmi,  
ancje se a vevin viodudis lis mês voris». **R.**

### **SECONDE LETURE**

**1 Cor 7,32-35**

**La virgjine e à pinsîr pes robis dal Signôr, par jessi sante.**

*Il toc al è sempliç ma te letare di s. Pauli al aparten a un cjapitul intîr (7, 1-40) e il ridusi dut a pôcs versets al riscje di fânus pierdi chel ecuilibri fra matrimoni e vergjinitât che ancje in S. Pauli al reste di fonde. Di fat: ognun al à vût di Diu il so don, cui tun mût, cui intun altri (v.7).*

*Za i dissepui i vevin dit a Gjesù: “Nol torne cont a sposâsi”. Ma lui ur disè: “No ducj a capissin chest discors, ma dome chei che ur è stât dât” (Cfr. Mt 19, 10-12). Cence cjoli nuie a ce che l’Apuestul al racomande, la peraule dal Signôr e je la miôr curnîs a ce che vuê nus ven proclamât.*

#### **De prime letare di san Pauli apuestul ai Corints**

Fradis, jo o varès gust di viodius cence fastidis. Chel che nol è sposât al à pinsîr pes robis dal Signôr, cemût fâ content il Signôr; chel ch'al è sposât invezit al à pinsîr es robis dal mont, cemût fâ contente la femine, e si cjate dividût. Cussì ancje la femine no maridade o la virgjine e à pinsîr pes robis dal Signôr, par jessi sante tal cuarp e tal spirt; la maridade invezit e à pinsîr pes robis dal mont, cemût fâ content il so om. Chest us al dîs pal vuestri ben, no par tindius un laç, ma par indreçâus viers di ce che al merte e al mene a stâ cul Signôr cence distrazions.

Peraule di Diu.

## CJANT AL VANZELI

Lc 7,16

### R. Aleluia, aleluia.

Un grant profete al è comparît framieç di nô:  
Diu al è vignût a viodi dal so popul.

R. Aleluia.

## VANZELI

Mc 1,21-28

### Al inscuelave come un ch'al à autoritât.

*O vin di tignî presint che il fat dal indemoneât al è ponût te peraule; la peraule di Gjesù intant che e dîs ancje e fâs: salte fûr...e al saltà fûr. Al sucêt culî come te creazion cuant che Diu al disè: "Ch'e sedi la lûs" e la lûs e comparî (Gjen 1,3).*

*La peraule di Gjesù e delibere chest om di ce che di tremant al veve intorsi, lu sbloche, lu disgrope, i done la fevele, lu consegne a la comunitât e lu met tune vite dignitose, gnove.*

*A son i miracui di Gjesù: la liberazion de persone di ogni sorte di sclavitûts, par rindile sane, umane, libare e contente.*

*E je une liberazion che la nestre societât e à tante dibisugne e li che Gjesù, cu la sô buine gnove, al è specialist.*

### Dal vanzeli seont Marc

A Cafarnao, jentrât in di di sabide te sinagoghe, Gjesù al tacà a insegnâ. E ducj a restavin dal so insegnament, parcè che ju inscuelave come un ch'al à autoritât e no come i scrituriscj.

Inte lôr sinagoghe al jere un om paronât di un spirt soç, che si metè a berghelâ disint: «Ce esal fra nô e te, Gjesù Nazaren? Sêstu vignût a ruvinânus? Jo o sai cui che tu sês: il sant di Diu!». Ma Gjesù i cridà disint: «Tâs e salte fûr di lui!». Alore il spirt soç lu sdrondenà di copâlu, po al petà un grant berli e al saltà fûr di lui. A cjaparin ducj une grande pôre, che di fat si domandavin un cul altri: «Po cui esal chel chi? Une dutrine gnove, insegnade cun autoritât. Ur comande fintremai ai spirits soçs e lôr i ubidissin». E cussi il so non si slargjà di ogni bande, par dute la regjon de Galilee.

Peraule dal Signôr.

### Su lis ufiertis

O metin sui tiei altârs, Signôr,  
i regâi de nestre suditançe;  
acetiju di bon voli  
e fasiju diventâ il sacrament de nestre redençie.  
Par Crist nestri Signôr.

### Antifone a la comunion Sal 30,17-18

Fâs lusî la tô muse sul to famei,  
salvimi pal to boncûr.  
Signôr, che no vedi di restâ deludût  
cun tant che ti ai clamât.

### O ben: Mt 5,3.5

Furtunâts i puars tal spirt,  
parcè che il ream dai cîi al è lôr.  
Furtunâts chei ch'a son bogns di cûr,  
parcè che a ereditaran la tiere.

## Daspò de comunion

Rinfuartîts cul sacrament de nestre redenzie, ti preîn, Signôr,  
che chest jutori de salvece eterne  
nus fasi cressi inte vere fede.  
Par Crist nestri Signôr.

\* \* \*

## Riflession di pre Antoni Beline: **Al fevelave cun autoritât**

Ancje chei che no àn tant a pratiche la storie dai Ebreus e i cantins de lôr religjon, a san ce tant rispjet che a vevin par dut ce che al jere stât scrit tal grant libri di Diu, la Bibie. E no dome no sgaravin di un centesin de leç e dai profetis ma i plui cuets a scrivevin lis peraulis santis sun strissulis di cjarte che ses picjavin su pe manteline e denant de muse, par che al diventàs vêr ancje fisicamentri un det de Scritture: “La tô leç le varai simpri denant dai voi”.

Podês dome crodi cemût che a restarin in chê di che Gjesù...

*Vanseli par un popul, an B, p. 102.*

\* \* \*

## Cjants

*Libri **Hosanna**, sot il titul **Eucaristie**: messe, benedizion eucaristiche, rîts e cjants; dal n.7 al n.62 comprendût.*

\* \* \*

*No je disgracie plui grande di chê  
di jessi cjapâts dentri te brame di vê simpri di plui.  
E te nestre societât al è chest mecanisim  
che nus fâs diventâ simpri plui sclâfs.*

Lao Tzu

\* \* \*

**Vinars 2 di Fevrâr: presentazion di Gjesù al templi, Madone cereole, benedizion des cjandelis: ultims lusôrs dal timp di Nadâl.**

\* \* \*

\* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris*

*dal popul furlan, Ed. Glesie Furlane, 2012.*

\* *Il cjant dai salms resposoriâi, Ed. Glesie Furlane, 2012.*

\* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*

\* *Par domandâ chescj libris scrivêt a [info@glesiefurlane.org](mailto:info@glesiefurlane.org)*

